

四庫全書

經部

欽定四庫全書

經部

四書或問卷三十二至九

詳校官監察御史_臣左周

刑部郎中_臣許兆椿覆勘

總校官編修_臣王燕緒

校對官中書_臣孫球

騰錄監生_臣

郭履元

欽定四庫全書

四書或問卷三十二

宋 朱子 撰

孟子

或問首章之說曰范氏詳且明矣但其曰事善民法與
播惡於衆及皆字之訓為未安耳曰孟子告齊宣王
曰是心足以王矣則仁心者固王政之本也今曰有
仁心仁聞而不能行先王之道則是所謂仁心者初

不足恃而所謂先王之道者又在此心之外也曰是
心足以王者言有是心而能擴充之以行先王之道
如首篇末所謂制民之產云者則可以王耳非謂專
恃此心而直可以王也先王之道固亦由是而推之
以為法耳但其盡心知性而無私意小智之累故其
為法也盡天理合人心雖聖人復起而有所不能易
者後之人君當因吾心而擴充之以盡夫法制之善而
充吾心之固有者非謂心外有法而俟於他事也後

人雖有是心然或未能無私意小智之累苟不循是而之焉則雖有仁心仁聞而未免於徇私妄作之失譬之蔑去規矩而欲以手制方圓其器之不至於苦窳也幾希矣曰所謂陳善閉邪者奈何曰君有邪心所當閉也然不知所以用之之道而逆閉之則動有矯拂之患其言不可得而入矣故必為之開陳善道使之曉然知善道之所在則所謂邪者亦不難乎閉之矣孟子與時君論事多類此其自謂敬上者豈虛

語哉

或問二章之說曰人之生也均有是性均有是性故均有是倫均有是倫故均有是道然惟聖人能盡其性故為人倫之至而所由無不盡其道焉此堯舜之為君臣所以各盡其道而為萬世之法猶規矩之盡方圓而天下之為方圓者莫不出乎此也故法堯舜以盡君臣之道猶用規矩以盡方圓之極一有毫髮之私介乎其間則蔽於人欲而不得盡乎天理之全

矣故仁與不仁其間不能以髮一出乎此則入乎彼
不可以不審其幾也曰程子道無無對之言奈何曰
此雖非正為孟子之言而發然其所言亦可深味與
所謂性善無對之云者異矣予嘗與人論此而問之
曰碁局之中一路者孰為對乎其人曰是所以對夫
三百六十路者云爾其言深有會於予意知此則程
子之意可以推之而無窮矣

或問七章之旨曰范氏論之詳矣但小國師大國一句

似失本意耳其末所論治天下莫大於仁一節甚善
所以告君者正當如此耳

或問十章之說曰程子初說至深切矣第三說却自暴
自棄最為的當皆宜深味也且曠其安宅則必放僻
邪侈而安其所不可安之居矣舍其正路則必行險
僥倖而由其所不可由之塗矣安宅正路人皆有之
而自暴自棄以至於此是可哀也

或問十二章之說曰諸說皆善擇焉可也曰亦有未盡

者乎曰獲上信友悅親誠身皆以有道言之則蓋有不由其道以求之者矣若諛說苟容以求獲乎上便佞諂隨以求信乎友阿意曲從以求悅乎親冥行助長而求以誠其身者皆是也孟子之言固已開其所入之塗矣而其交徑別岐亦不可以弗之表也曰所以擇乎諸說者奈何曰如呂氏之論明善誠身皆有所未盡其於明善直以為凡在我者皆明其情狀而不知所從來殊不知天下事物之理皆有所謂善要當

明其當然而識其所以然使吾心曉然真知善之為善而不可不為是乃所謂明善者若曰知在我者之所從來而已則恐其狹而未究於理也其於誠身直以為知有是善於吾身而已是亦未知孟子所謂誠身正謂心思言行之間能實踐其所明之善而有諸身也其以知至為非思勉之所及亦過高之失其論誠者天道亦有未安者已於中庸論之矣楊氏身不行道所厚者薄責善朋友之道三語發明文意有所

未當其論誠身而以忘機言之似亦非孟子本意其餘則固多可取也

或問十四章之說曰范氏之說詳明而所論重人命者尤善楊氏之言學者亦宜思之而為之說尹氏分別天理人欲於毫釐之間尤可深味也

或問十八章之說曰楊氏得之矣徐氏引穀梁子曰羈貫成童不就師傅父之罪也不以不孝為罪而以不就師傅為罪亦善引据者

或問十九章之說曰程子至矣所論魯子周公事先儒所不及也

或問二十章之說曰程子張子范楊皆深得之可詳味也但范氏解章首兩句非本文之意

或問樂正子從子敖何也曰予嘗攷於孟子之書王驩齊王之幸臣蓋嘗欲自託於孟子以取重故孟子使滕則王必以驩為介未嘗與言行事於樂正子之來則又正言以折之至其弔於公行子之家又不與之

言焉則所以絕之者淡矣樂正子不察乎此而輕身以從之意者特藉其資糧輿馬以見孟子而已故孟子以舖啜罪之而范尹皆以不能改於其德為樂正子之罪恐非孟子之意也必若其言則孟子曷為不與之言而使之改與孟子之所以去齊其事雖不可考疑驩以是積憾而去之也

或問二十六章之說曰范氏之說本孟子正意也程子之說又推明其一說尤見聖人所處義理之精然以

事理度之但其於未及告而受堯之命耳其後固不容終不告而遂娶以歸也

或問二十七章之說曰諸說皆得之矣曰實之為精實何也曰是有數義有以實對虛而言者有以實對偽而言者有以實對華而言者此所謂實則以對華而為言耳曰何也曰以實對虛而言者曰仁義理也孝弟事也理虛而事實此孝弟所以為仁義之實也然以事為實可矣謂理為虛則理宜虛而無物之謂乎

以實對偽而言者曰莫非仁義也惟孝弟發於人心之不偽此孝弟所以為仁義之實也然謂孝弟為不偽可矣謂凡惻隱羞惡之發皆人之所偽為可乎惟以實對華而言則以為凡仁義之見於日用者惟此為本根精實之所在必先立乎此而後其光華枝葉有以發見於事業之間此說為得之耳

或問二十八章之說曰范呂皆得之而李氏說亦甚善

四書或問卷三十二

欽定四庫全書

四書或問卷三十三

宋 朱子 撰

孟子

或問首章之說曰范氏博而篤矣楊氏以一事言之固亦舉其大者然恐其未盡孟子之意也曰此以為舜卒於鳴條則湯與桀戰之地也而竹書有南巡不反禮記有葬於蒼梧之說何邪曰孟子之言必有所據

二書駁難恐難盡信然無他考驗則亦論而闕之可也

或問孔子以子產之惠為君子之道而子以私恩小利言之何也曰孔子之言通乎巨細故不害其為君子之道此承上文乘輿濟人而言則私恩小利而已矣曰子產濟人之事有仁人之心焉其惠雖小猶不失乎為政之本若孟子所謂先王之政者乃獨以時修橋梁而已將不反為治之末邪徒謹於此而愛人之

心不至吾恐其所以自結於民者或反不若子產之
深也曰子產之事可謂有不忍人之心矣然先王則
以不忍人之心而行不忍人之政是以其體正大而
均平其法精密而詳盡而其利澤之及人如天地之
於萬物莫不各足其分而莫知其功之所自苟有是
心而無是政則不過能以煦濡姑息苟取悅於目前
而結其驩虞之愛顧其耳目之所不及則恩惠之施
已不免於有所遺矣況以天下國家之大又安得人

人而濟之邪昔諸葛武侯嘗言治世以大德不以小惠而其治蜀也官府次舍橋梁道路莫不繕理是亦庶幾乎先王之政矣曰子產相鄭能使都鄙有章上下有服田有封洫廬井有伍則非不知為政者橋梁之修尤非難事乃獨有闕於此何邪曰聞之師曰子產之才之學於先王之政雖有所未盡然其於橋梁之修蓋有餘力而其惠之及人亦有大於乘輿之濟者矣意者此時偶有故而未就又不忍乎冬涉之艱

而為是耳然暴其小惠以悅於人人亦悅而稱之孟
子慮夫後之為政者或又悅而效之則其流必將有
廢公道以市私恩違正理而干虛譽者故極語而深
譏之以警其微亦拔本塞源之意也此說最為得之
若范氏以為子產身相小國非深得民心則無以抗
大國故其濟人如此其急則恐子產之意不專出於
此也

或問三章之說曰諸說皆善但楊說引鄭忽事以詩序

而言耳其實未必然予於詩傳論之詳矣

或問六章之說曰諸說皆善而張子所謂真義理者至矣其曰守禮未為失者尤學者之所當知也

或問八章之說曰程子張子之言皆善楊氏引舜及孔明事意則甚善然亦非孟子此章之本旨也

或問九章所謂後患者謂得罪於其人邪抑恐其亦言己之不善邪曰是皆有之然斯言必有為而發今不可知其所指矣

或問十章之說曰楊氏之說甚善然所謂本分者乃義理之至當非苟然而已也學者於此宜深察之一有小差則流而入鄉原之亂德矣

或問十一章之說曰諸說皆善而尹氏尤精然所謂信果在其中者亦言外之餘意也

或問十二章之說曰程子初說與趙註同恐其論之未定也其後兩說則已密矣曰赤子之心張子呂氏以為未發而程子以為已發夫赤子之心固不可為未

發然豈不亦有未發之時乎曰程子之告呂與叔固自以前所謂言心皆指已發者為未當矣夫赤子之心衆人之心各有未發已發之時但赤子之心未有私意人欲之累故雖其已發而未必中節要亦為未遠乎中耳曰程子所謂聖人之明鑑止水其所以異於赤子之純一無偽者何也曰赤子之心全未有知然以其未有私意人欲之累也則亦純一無偽而已爾衆人既有所知則雜乎私意人欲而失之聖人則

察倫明物酬酢萬變而私意人欲終無所入於其間
是以若明鑑止水之湛然不動而物無不照也曰楊
氏之說如何曰程子以為發而未遠乎中則可而楊
氏以為發而未離乎大本則不可蓋發乎此則離乎
此但其離有遠近之間耳未離乎此則豈可謂已發
乎此哉是蓋因程子之言而失學者不可不察且大
人云者亦對赤子而言之耳不當限以未化之說也
如曰不為非禮義之禮義言行不必信果格君心之

非正己而物正之類聖人亦豈有以加於此哉曰然則程子亦言聖人之心若以別乎大人者何也曰程子蓋亦通言之以別乎赤子耳非以是為化與未化之別也

或問君子深造之以道欲其自得之也何也曰學是理則必是理之得於身也不得於身則口耳焉而已矣然又不可以強探而力取也必其深造之以道然後有以默識心通而自然得之也蓋造道之不深者用

力於皮膚之外而責效於旦夕之間不以其道者從事於虛無之中而妄意於言意之表是皆不足以致夫默識心通之妙而自得之必也多致其力而不急其功必務其方而不躐其等則雖不期於必得而其自然得之將有不可禦者矣若程子所謂篤誠燭理潛心積慮優游涵養栽培深厚皆其所以造之之道而君子之所以自得者其所謂聞淺近事莫非義理有安排布置者皆非自得雖便放開不靠書冊之類

則又著夫自得之驗而欲學者有以審之也其曰放
開亦非惡其拘而故放使開也曰自得之則居之安何
也曰未得之則固無可居之地得而不出於自然則
雖有所居而不安惟自得之則理之在我者吾皆得
以居之如人有室廬之安動作起居種種便適自春
戀而不去也曰居之安則資之深何也曰未得其所
居則無所藉以為用居而未安則其所藉以為用者
淺迫而易窮惟居之安則理之在我者吾皆得藉以

為用而無窮如富人蓄積之多金珠穀帛無求不獲
見其出而不見其盡也曰資之深則取之左右逢其
原何也曰無所資者固無本之可求資之淺者取之
艱遠而或值或不值也惟資之深者不待遠求而所
求無不得如既取諸其身之左而值其所資之本又
取諸其身之右而復值其所資之本以水譬之苟其
源之盛則滔滔汨汨不舍晝夜或沂或汭無不值其
來處此君子所以欲其自得之也曰諸說如何曰程

子之說吾已論之矣張子以為教人之事蓋以之字
其字為說於理亦若可通然以全章大意論之則此
說恐非孟子之本旨也范氏大槩亦善然不親切其
本又專以求於心為言則不足以盡夫所以造之之
道要當以是為本而從事於程子之說焉則庶幾其
可耳

或問十五章之說曰所謂約者吾於論語已言之矣此
則正以知要而言也然此亦上章之餘意故記者屬

之蓋博學詳說者以道深造之謂其曰將以反說約者則欲其自得之深也曰諸說如何曰程子知要之說是也但所引顏子之事則未然耳張子所謂先守至約然後博學以明夫至約之道蓋欲學者先求放心有所存主然後博學詳說而反乎此耳其指示學者用力之序意則甚善但曰先守至約則與孟子之言相違而不免於語病必若程子所謂先求放心然後自能推尋向上去者則語意盡善而次序不差矣

其曰心之博學者所以為約亦曰由其先有所守然後能用此心以至其博也呂氏以約為誠蓋因中庸而發誠固理之實然非約之所以得名也謝氏四旁中央之喻蓋曰不極乎四旁之所至則不足以識中央之所在故必由四旁而識中央如因博以求約也此其意亦善矣然四旁中央終成兩處不若以貫通言之之為密也范氏初說甚善但自揚雄以下則支離矣楊氏分別孟揚得失意極親切然語亦有未盡

使讀者不能無疑蓋所謂博約由孟子之言則博者所以極夫理之散殊約則舉是散殊之理而一貫之耳是以既博學之又詳說之而卒有會於約蓋所謂博且詳者固未嘗出於約之外而所謂約於其博且詳者又未嘗有所遺也由揚子之言則所謂約者乃博中之一物方其博也固不知此物之為約而茫然泛然雜取乎其外及其約也則又守此一物而於所謂博者之中僅乃處其千萬之一焉是亦何足以為

約而守之乎以是推之則楊氏之意得矣

或問十六章之說曰張子得之矣范氏引德力服人之異以明之則亦非此章之意也蓋彼皆言服人而以德力分王霸此則皆以德而服人養人又有公私小大之不同不當引彼以釋此也其引政在養民者以張子之言觀之是亦養人之一事然專以此言則亦不盡本文之意矣尹氏之失亦猶范氏之云耳

或問十七章之說曰如張子之意則言無實不祥云者

虛引以甚之之詞也而下句實字疊上句如范氏之說則言無實不祥自為一義而下句實字與上句不相蒙夫此章僅三句耳而首尾銜決遽如此於理有不得而通矣然張子所釋言無實不祥一句亦通暢蓋此或有所為而言而無以攷所由矣姑存而闕之可也

或問十八章之說曰集註備矣仲尼歎水之旨吾於論語亦嘗言之取而參焉可也曰諸說如何曰張子以

止於至善為有本原似涉倒置蓋止者歸宿之義非
本原之義也范氏謂君子以情實為本名譽為末亦
非孟子之意孟子之意正以誠心實行為本而言其
有是者所行通達無所不至其無是者雖有聲譽終
不能久耳非以情實對名譽為本末也尹氏自本而
往者語雖約而意則周矣

或問十九章之說曰程子張子之言至矣但或人之問
有未盡者程子雖以天理告之然不言人之所以異

於禽獸者以其稟賦有異於物而得是天理之全也
豈或記者方且自主其說雖聞夫子之言而不能盡
領其意與若尹氏之說則尤約而盡也曰明物察倫
而後能由仁義程子張子之說何如曰是三言者以
學言之則有序猶格物致知而後意誠心正也自聖
人言之則生知安行不可以先後言矣二夫子言之
亦以其始終條理言之非真以為有先後也曰張子
所引別生分類之說如何曰是亦舉其一事耳非謂

專此一事也曰旁用之說如何曰是極言之耳非謂不必正用而專欲旁用也

或問二十章之說曰諸說大意皆善但其文義之間不能無可疑者如程子說望道張子說立賢池邇忘遠恐未可為定論也曰以而為如亦有據乎曰而如二字蓋通用之詩曰垂帶而厲鄭箋曰而亦如也此亦以而為如也春秋星隕如雨左氏曰與雨偕也此以如為而也他如此類不可殫舉故陸氏釋文序論

音讀之訛曰而如靡異則其混讀而互用之久矣曰
是則然矣然其曰求道之切者恐非所以言聖人之
心也奈何曰為是說者正以其德為聖人而心不自
足如此是乃所以深明聖人之心也且子胡不以視
民如傷者例而觀之乎夫文王之民固已無凍餒者
矣而視之猶若有傷則其於道雖已與之為一亦何
害其望之如未見哉若夫博施濟衆堯舜猶以為病
而君子之道夫子自謂未能其心亦若此而已矣如

果聖人也而其心侈然每以聖人自居焉則亦豈所以為聖哉古今為說迂回贅附失其文字之本意而於聖人之心又不能有所發明由不察乎此而已然則文字音讀之學豈可忽哉讀者細考乎此而虛心以求之則庶乎其無所疑也曰或者有謂武王之不泄邇不忘遠非仁也勢不得不然也信乎曰此以世俗計較利害之私心窺度聖人者之言也聖人之心所以異於衆人者以其大公至正周流貫徹無所偏

倚雖以天下之大萬物之多而視之無異於一身爾
是以其於人之疴癢疾痛無有不知而所以撫摩而
抑搔之者無有不及此武王之不泄邇不忘遠所以
為德之盛而仁之至也今日迫於勢而非仁則不知
其視聖人之心為何如而指所謂仁者為何物哉蓋
其學本出於權謀機變之巧故凡其形於心術之間
者莫非計較利害之私因以己心窺測聖人而不自
知其非也世之學者始則以其文字之美而悅之及

其誦習之久而益嗜其腴則雖端人良士亦且與之俱化而不自覺其心術之移矣可不戒哉吾為此論久矣近讀陳魯公集有論此者適與鄙意合是固德人之言也夫

或問詩亡而後春秋作有以詩止於陳靈而後孔子作春秋者何如曰詩之本義不可知矣無以考其得失然恐謂雅亡者或近之也諸說何如曰泛而取之則皆善矣然尹氏之言尤約而盡也

或問私淑之說曰張子前說得之矣張子之文又有自
謂私淑祖考遺訓者其用二字正如此亦謂私善其
身於其祖考之訓耳若程子之說則於上文之意恐
或未通而語勢似亦倒置故竊以張子之說為安但
後說孔子之傳無窮於文意為小戾不若前說之善也
或問取者貪之屬不取者廉之屬猶與之為惠不與之
為嗇死之為勇不死之為怯也今之過取者為傷於
廉則宜以不與為傷惠不死為傷勇矣而反以與為

傷惠死為傷勇何哉曰過取之傷廉過於此而侵奪
於彼者也過與之傷惠過死之傷勇過於此而反病
乎此者也蓋奪乎彼者其失為易見而病乎此者其
失為難知故孟子舉傷廉以例二者是亦孔子過猶
不及之意耳曰然則程子傷惠之說如何曰是其理
則至矣然非此章本文之意也蓋本之上文既不同
推之下文又不類必欲以是為說則傷勇亦為害其
所當勇邪若伯子所謂義無對者則精約有味而楊

尹之說亦善但楊說畏過死之傷勇也已甚其說之
流將有咎正直而排死節之病均之二者皆為不得
其中則與其貪生忍恥終無以有益於斯世則不若
捐軀以就死猶或有以爭救於萬一之間也若夫過
與之傷惠推之太甚亦恐不能無弊予於論語子華
使齊之事既言之矣學者詳之

或問二十四章程子之說前後不同何也曰前論讀書
之法後論處事之方善讀者融會而貫通焉則亦不

見其有異矣

或問二十六章之說程子以為皆為智而發今以章首之言推之恐其或為性發而非智之謂也曰不然章首之言所以發明天下事物莫有各有自然之理而是理又皆有迹而可尋以見智之不必用而不可用其下遂言惡夫鑿智之說詳焉而卒又歸章首之意使其專為性發則其言之詳略豈當若是其倒置哉曰日至之說或但以為日之所躔如何曰是亦可通

然非文義所係則亦兼而存之可也曰程子之荅張子旁引此文以為說邪果有以發乎此章之意邪曰是固不主於此章之文義然既通乎此而後即其言以推之則其於造道而入德也用切而意廣矣曰他說如何曰其大旨則皆得之但叔子以利為本之云恐未安而楊氏之言有不可曉者其引列禦寇之言以故滅命云者乃與孟子之意正相反且若是云則苟求其故之說又若何而可通也邪嘗觀蘇氏以故

為性之所有事而失其性者其意亦若此矣而又以
為性至靜故不可見天則有事於運行故人得以度
之蓋原於佛老之意而又以就其前說殊不知天之
運行是乃所為天之性使天也而塊然無事於運行
則亦何以為天也哉此又失之遠者聊復論以解學
者之惑

或問二十七章之說曰此無異論然愚嘗聞之師曰陳
司敗譏孔子為有黨而孔子受之不辭右師以孟子

為簡已而孟子辯之如此其力聖賢地位固不同也
使孟子聞右師之言而曰禮也足矣無已則曰朝廷
不歷位而相與言不踰階而相揖則已微見圭角矣
然猶未也而又必盡其辭焉此所以鋒芒發露而不
及孔子之渾然也學者於此宜致察焉

或問古之聖人多矣必言舜為法於天下何也曰法者
人倫而已他聖人者因其常而處之不失未足以見
人道之盡也惟舜極其變而不失其常是以人道之

盡於此尤可以見焉故特舉舜而為言耳然其所謂
法者亦豈舜之自為哉但性天之妙人所難明而舜
之所行有以盡發其蘊使天下後世無不見聞故舉
舜以見法耳程子所謂觀乎聖人則見天地者正謂
此也曰楊氏以為孟子三自反不若顏子不校信乎
曰自反所以自修學者之事也不校不見可校成德
之事也其淺深之序信如楊氏之說矣然自反之說
謹嚴精切正學者所當用力處若反之未至而遽欲

自以不校為高則恐其無修省之功而陷於苟且頹惰之域也

或問二十九章之說曰程子至矣張子所謂觀人臨時志如何者尤有以曲盡夫聖賢之心也楊氏荅了翁書甚善其論正心誠意者尤切但非孟子本文之意尹氏辭約理明而其後說尤善也

或問三十二章之說曰楊氏所論本章之義得之矣但其論格物而曰反身而誠則舉天下之物在我此則

未安學者詳考大學之序以及此書反身之說則可
見矣

四書或問卷三十三

欽定四庫全書

四書或問卷三十四

宋 朱子 撰

孟子

或問首章之說曰諸說皆善而尹氏盡性之云尤精但
張子所謂怨其不我愛恐非舜與孟子之意以舜五
十而無父母亦無所考姑從楊氏之說可也

或問二章之說曰不告而娶已見於七篇矣游氏之意

亦為曲盡象欲殺舜事程子之言至矣其曰人情天
理於是為至者尤為精切學者所宜反復而深思未
易草草領略也其所疑萬章之言則林氏論之為詳
然學者止欲識得舜之心耳此亦不足深論也

林氏曰
司馬公

以為是時堯將以天下禪舜替象雖愚亦豈不利其
子與兄之為天下而欲殺之手惜使殺之堯必誅已
宜亦有所不敢矣蘇氏以為舜之側微已能使替象
之不格姦矣豈至此而猶欲害之哉以此皆疑孟子
之誤惟程子以為此非孟子之言乃萬章傳聞之誤
而孟子有不暇辯耳是數說者恐其皆未安也蓋天
下之事有不可以常情測度者使替象而猶知利害
之所在則亦未為甚頑且傲而舜之所處亦未足為

天下之至難矣不格姦者但能使之不陷於刑戮若家語所謂索而殺之未嘗可得即此焚廬擄升之事也且聖賢於世俗傳聞之事有非實者必辯而明之以曉天下後世豈有知其不然而不暇辯者哉曰張子諸說如何曰張子於過化之語已失其文義至施之於此尤為不類其曰與人為善曰隱惡曰行其所無事亦然蓋此事要切在兄弟天性處今以他事雜之反為失其指歸若因彼以及此則可耳其曰道無權正之別權與正一者語亦傷快若曰告而娶正也舜不告而娶權也然既是當為之事則權與正一

而無輕重之別如此而言則庶乎其備矣其曰瞽瞍
不見百官牛羊雖使不見亦恐無全然不知之理其
曰備之有素曰在吾術內者似非所以語舜之心也
曰楊氏謂舜惟恐不獲於象者如何曰舜之所以然
者不為是也但其兄弟之愛發於自然不以殺己而
有變耳若曰惟恐不獲於象而後同其憂喜焉則是
畏其殺己而幸其寬已亦非所以語聖人矣

或問四章之說曰程子說詩之解善矣范氏此數章於

文義極疎而大義則密告君之道所當然也

或問舜禹避位之說或者疑之以為舜禹之為相攝行天子之事久矣至此而復往避之有如天下歸之而朱均不順則將從天下而廢其君之子邪抑將奉其君之子而違天下之心邪是皆事之至逆而由避有以致之也至益不度天命而受位矣避之而天下不從然後不敢為匹夫猶且恥之而謂益為之哉是其說也奈何曰愚嘗聞之師曰聖人未嘗有取天下之

心也舜也禹也益也於其君之老也奉命以行其事而已未嘗攝其位也於其君之終也位冢宰總百官以行方喪之禮而已未嘗繼其統也及夫三年之喪畢則當還政嗣君而告歸之時也於是去而避之亦禮之常而事之宜耳然其避去也其心固惟恐天下之不吾釋也舜禹益迫於天命人心而不獲已者若益則求仁而得仁又何恥之有哉論者之學不足以及此而徇於利害權謀之習妄意以為聖賢之心亦

若己之心而已矣蓋以曹操不肯釋兵歸國之心而為舜禹益謀則宜其以為不當去位而避朱均以曹丕累表陳讓之心以為舜禹益謀則宜其幸舜禹之得之而以益之不得為可恥也嗚呼學者能反是心以求之則聖人之心庶乎其可見矣曰程子所論外丙仲壬之年商書固有成湯既沒太甲元年之云矣或以邵子皇極之書考之亦然彼蓋以數推之其不誤矣曰書序之文本非正經未足據也且事之有

理者可以驗其有迹者可以證如其不然而又無所繫於大義則亦論而闕之可也數之茫昧吾所未學又安能必其可信而隨人以信之邪且魏惠襄哀之年見於竹書明甚史記蓋失其實邵子之書乃從史記而不取竹書又安知其能不誤邪

或問七章之說曰程子覺字之說至矣特後段所引達可行於天下自與前段文意相反豈其記錄之誤若如前段之說則此所謂天民但言天所生之民耳其

曰天民之先覺蓋曰天生此民之中特為先覺者而己呂氏以五就桀為無傷於先覺蓋以論語先覺之說論之非此章之旨也又以五就桀為孔子所不為此亦未可知而所論學者之事則正矣楊氏樂堯舜之道之說似亦過之夫田夫野老之所日用固莫非堯舜之道然堯舜之所以為堯舜者其盛德大業之全體非一端所能盡而伊尹之所樂亦豈其專在於此而已哉此蓋生於禪者之說

昔有以此問某人如何是堯舜之道者某

人答云江上一犁春雨

傳者悅其新奇高妙而不深考於其實

遂取以為說而張大之其亦誤矣且如其言則伊尹之耕於野其於堯舜之道固已親見之久矣又何必堯舜其君堯舜其民而後為親見之邪其論一介千駟之說則善也曰道義一物非其義則非其道矣一介不妄取予則其大者亦可知矣而既曰非義又曰非道既曰一介又曰天下千駟何也曰道義云者兼舉體用而言曰一介千駟極其多少而言也蓋人之

氣質不同器識有異或務大而忽小或拘小而遺大
故必兼舉而極言之然後足以見其德之全耳夫豈
贅於言哉

或問八章之說程子所謂聖人非不知命然於人事不
得不盡此說非是者奈何曰人事即天命也人事不
盡則禍患乃其自取而天命不立矣故盡人事者是
乃所以順夫天命而謹守之此知命所以不立乎巖
牆之下也若曰已知命之若彼而姑盡其事之如此

則是乃天人義命判然二物且聖人之知命也未嘗
審而其行事或出於苟然矣曰其論無義無命者如
何曰處置者求合乎義也放下者順受乎命也曰諸
說如何曰義命之際呂密而楊疎而尹氏為君言之
亦可謂得其要矣

或問九章之說曰范氏詳且明矣其論百里奚隱於市
井本無干繆公之意又言聖賢未遇不恥鄙賤之事
而惡不由其道以得富貴此意甚正宜深味之所引

莊子之言亦甚善其辯史記之失尤佳然按左氏之言則媵秦穆姬者乃并百非百里奚也尹氏之說則切中時俗之弊矣

四書或問卷三十四

欽定四庫全書

四書或問卷三十五

宋 朱子 撰

孟子

或問三子之偏如此而孟子以聖名之何也曰三子之聖因其氣質之偏而力行以造極卒至乎不思不勉之地而表裏洞然無一毫人欲之私者雖謂之聖然於孔子則有不得而班者矣蓋以孟子之言差之則

金玉備而巧力全者孔子也若顏子之博於文而約以禮竭其才而不能及則金聲已備而玉有未振巧足以中而力有未充者與故以所至論之則顏子不若三子之成以所期言之則三子不若顏子之大以學之序而論之則三子皆失其所當先故行愈力而見愈偏而顏子循序以進則其所至未可量也惜乎早死而不及見其成耳然就三子而論之則伊尹之學又密於夷惠矣曰諸說如何曰程子張子至矣楊

氏說亦多得之但間引知之於賢者為失其文義又
曰大而化之則雖智而忘其智者亦涉老莊之流而
楊氏既不之正又自以智為聖人從容中道之妙似
亦有未安者其攻王氏之失則考之詳而論之備矣
若謂伯夷亦將為伐桀之事則又未必然也尹氏專
守師說而此章獨否豈於分畫之間有所未達而然
與

或問孟子所論班爵封國之制皆與周禮不同何也曰

是不可攷矣蓋自孟子時已無明驗而周禮後出又有不可盡信者是以諸儒之說紛然而卒不能得其正也曰畿內受地之制其有稽乎曰周禮所謂公邑家邑小都大都者是已而王制亦有天子縣內諸侯之數但其多寡與周禮復不同耳曰陳氏以為王之子弟及公卿以下其官不少也皆受地如列國之君則千里之畿有所不容疑亦視此以為差降非必盡如之也此說如何曰以周禮考之其制亦與孟子不

同然大都則方百里而小都亦五十里也但王制以
為天子縣內諸侯祿也則國不繼世而食之亦無嫌
於不容矣其據土以傳世殆周禮之末失與

或問孟獻子有友五人之說曰如舊註范氏之論則是
五人者為欲挾其賢以驕人而屈於無資故不得已
而友獻子若亦有百乘之家則且又將并其富貴而挾
之而不與獻子為友也是豈賢者之心哉其亦必不
然矣至於張子之說則善矣然詞亦傷巧與孟子他

文不類而所謂亦有獻子之家者其亦字亦未通蓋不可考矣姑從張子之說而闕其疑以俟知者可也或問殷受夏周受殷所不辭也於今為烈趙氏有成說矣或者又謂若義在可受則三代受人之天下而不辭今禦人者乃為暴烈不義如此如何而可受其饋乎烈如詩序所謂厲王之烈者暴烈之意云爾或又以為烈光也三代相受而烈光至今也是三說者擇一而從之可也何至闕而不為之說乎曰熟讀本文

此十四字自與上下文不相屬如趙氏之說則辭受二字與上下文亦不相似或者二說亦覺費力不若從李氏闕之之愈也然此章之文有可疑者不獨此也如獵較薄正之屬皆所未明是以備論而闕之耳或問六章之說曰范氏詳矣楊氏引周禮為說其義尤精也

或問卒章楊氏之說曰是其說則當矣而有所未備也蓋孟子所謂易位者言其理當如是耳若三仁之事

則比干箕子固有所不及為若微子之去亦或其勢之不便也然觀其引身而去以全先王之世則其計慮亦豈苟然者哉若其力之可為則伊尹霍光固以異姓之卿而行之矣况有骨肉之親者乎然世或疑此言有以起篡奪之禍者則孟子豈不嘗曰有伊尹之志則可無伊尹之志則篡乎曰尹氏後說如何曰如此是初無此理而孟子虛說此言以脅其君也其亦不然矣

四書或問卷三十五

欽定四庫全書

四書或問卷三十六

宋 朱子 撰

孟子

或問首章之說曰張子言禮為安佚之道而不言其為性之有也然既為安佚之道則其為性之有明矣學者必以此意推之然後可以破告子荀卿之說

或問二章之說曰程子以為湍水即揚子之說其大指

固略同矣然告子以善惡皆性之所無而生於習揚
子以善惡皆性之所有而成於修此亦有小異也張
子以為性之本原莫非至善是也而曰習而為惡亦
性也飲食男女皆性也則反近於揚雄告子之說其
以揚雄為見末流而未見本原又有取於其修之之
說亦有不可解者謝氏以性之為不善者為非性之
至亦非是其曰水之激躍者非水之性則善也觀過
知人之說予於論語已辯之矣

或問子以告子論性數章皆本乎生之謂性之一言何也曰性之為說吾既詳言之矣告子不知理之為性乃即人之身而指其能知覺運動者以當之所謂生者是也始而見其但能知覺運動非教不成故有杞柳之譬既屈於孟子之言而病其說之偏於惡也則又繼而為湍水之喻以見其但能知覺運動而非有善惡之分又以孟子為未喻已之意也則又於此章極其立論之本意而索言之至於孟子折之則其說

又窮而終不悟其非也其以食色為言蓋猶生之云爾而公都子之所引又湍水之餘論也以是考之凡告子之論性其不外乎生之一字明矣但前此未有深究其弊者往往隨其所向各為一說以與之辯而不察其所以失之之端獨在於此是以其說雖多而訖無一定之論也曰然則程子之說奈何曰是亦精矣獨生字之義若有未瑩是以吾說不免有小異者知其所論氣質之性理有善惡及人物之性所以不

同如隙中日光及以孟子之言為極本窮源之類則固未嘗敢有所疑也若其曰論性不論氣不備論氣不論性不明者則又極至之言蓋孟子之言性善者前聖所未發也而此言者又孟子所未發也曰然則告子固指氣質而言歟曰告子之所謂性者固不離乎氣質然未嘗知其為氣質而亦不知其有清濁賢否之分也曰張子諸說如何曰不通晝夜之云已非孟子所斥之本意其下諸說則皆至論而卒章所謂

今之言性者漫無執守所以臨事不精學者先須立人之性學所以學為人者則尤親切也予嘗以此章之旨問於李先生先生曰孟子之意只恐其昧於人性之善耳此正張子卒章之意也曰楊氏所謂陰陽無不善而人得以生故性無不善如何曰陰陽氣也不能無不善唯所以陰陽者則是所謂道而無不善也今既以陰陽為無不善而不能必其無不善則又曰善者其常而亦有時而惡焉則非所以語性之善

矣豈其記者之失也歟

或問四章之說曰飲食男女固出於性然告子以生為性則以性為止於是矣因此又生仁內義外之說正與今日佛者之言以作用為性義理為障者相類然孟子不攻其食色之云者使彼知義之非外則性之不止於食色其有以察之矣張子之說發明仁義之意亦親切而有味

或問五章之說曰范氏詳矣程子於易傳發明義非在

外之意尤為有功然彼直內之敬與此章敬叔父敬弟之敬若不相似也而楊氏引以為說何哉

或問公都子問性而孟子以情與才者告之何也曰性之本體理而已矣情則性之動而有為才則性之具而能為者也性無形象聲臭之可形容也故以二者言之誠知二者之本善則性之為善必矣曰然則程子何以言才之有不善也曰此以其稟於氣者言之也蓋性不自立依氣而形故形生質具則性之在是

者為氣所拘而其理之為善者終不可得而變但氣之不美者則其情多流於不善才亦有時而偏於不善若其所以為情與才之本然者則初亦未嘗不善也孟子程子之說所以小異而不害其為同也曰孟子初未嘗有氣質之說也孔子雖以性之相近而言然亦不明言其為氣質也程張之說亦何所據而云乎曰孔子雖不言相近之為氣質然其於易大傳之言性則皆與相近之云者不類是固不無二者之分

矣但聖人於此蓋罕言之而弟子有不得而聞者故其傳者止是而無以互相發明耳孟子雖不言氣質之性然於告子生之謂性之辯則亦既微發其端矣但告子辭窮無復問辯故亦不得盡其辭焉孟子既沒學失其傳吾儒之言性者漫不省此而支離穿鑿之說滿天下學者方且昏迷眩瞶不知所定而為釋氏者又鼓其荒誕之說而乘之雖其高妙虛無若不可詰然覈其實則所謂蠢動含靈皆有佛性之說所

謂作用是性之說皆不過告子生與食色之餘論耳
至於性之為理與其仁義禮智之蘊惻隱羞惡恭敬
是非之發則反以為前程妄想而棄絕之及論智愚
善惡之不齊則舉而歸之輪迴宿習不可致詰之地
舉世之人亦且崇信而歸往之無有能異其說者及
周子出始復推太極陰陽五行之說以明人物之生
其性則同而氣質之所從來其變化錯揉有如此之
不齊者至於程子則又始明性之為理而與張子皆

有氣質之說然後性之為善者無害於氣質之有不善氣質之不善者終亦不能亂性之必為善也此其有功於聖門而惠於後學也厚矣子尚安得以其無所據而為疑耶曰孟子之言性也情也才也皆未嘗不善也而程子以來乃有以才為有善不善者何也曰以性而言則才與情本非有不善也特氣質之稟不齊是以才有所拘情有所徇而不能一於義理耳至於性則理而已矣其純粹至善之德不以氣質之

美而加多不以氣質之惡而為有損特其蔽之厚薄
隨有不同耳曰然則孔子之所罕言者孟子詳言之
孟子之所言而不盡者周程張子又詳言之若是何
耶曰性學不明異端競起時變事異不得不然也曰
程子嘗云佛亦言性本善然則所以異於吾說者何
也曰佛之所謂善空而無物之謂也若吾之所謂善
者則彼固以為塵勞妄想而為不善之尤矣惜乎問
者之不及此而不足以盡發程子之言也若其所謂

性即是理而原其所自未嘗不善者則自孟子以來
未有及此者矣曰比其他說如何曰是其得之者固
多矣獨以若為順者恐於文義有所未安而謂孟子
不暇分別才情之有不善則亦與所謂言舉天下之
才與論一人之才不同皆若有可疑者其曰稱性之
善者則前輩固疑其不盡出於夫子之言而所謂動
為心者亦與心有指體指用而言及張子心統性情
之說不類疑亦記錄之或差也其他則皆至論而人

者一條尤為精約也曰張子之說如何曰是其為說
多善而所論性情歸處惻隱殘忍之心各自何處而
來者尤為切要但論韓子未當其病耳曰楊氏諸說
如何曰其第一說善矣而辭有未暢第二說則吾已
辨於第八篇矣然此論物各有則而曰接於外而不
得遁焉者其必有以也則無乃空虛無實而近於佛
氏之云乎然其於三經義辨有曰視聽言動必由禮
焉此一身之則也為君而止於仁為臣而止於敬為

父而止於慈為子而止於孝此君臣父子之則也夫
婦有別長幼有序朋友有信此夫婦長幼朋友之則
也則得之矣豈其晚歲之所得有進於前乎然其言
亦有未瑩者若曰視聽言動必有禮焉一身之則也
君之仁臣之敬子之孝父之慈朋友之信君臣父子
朋友之則也則庶乎盡之矣其一說又謂知其體物
而不遺則天下之理得物與吾一然後物不能亂吾
之知思者蓋以釋夫大學物格知至意誠之旨也以

彼經文考之恐不如是其亦佛氏之餘乎其辨蘇氏之說則善矣然蘇氏性習之云正告子湍水之論也能焚能熟乃其設譬之不善也不攻其本而詰其末使彼而易之曰猶火之能熟而能燬之則又將何以詰之乎蘇氏道不可名之說則謬矣而所以辨之者亦未得其要領也盍詰之曰道未有不可名者也以道為不可名者是不見道而自誣以欺世之說也其所謂一與中者豈以舜禹授受之言論之乎若是則

一者不二其心之謂中者無過不及之名耳皆非前所以命夫不可名之道而寄之也至於子思之言喜怒哀樂之未發謂之中者則所以狀性之德而非允執厥中之中矣然亦正以其無所偏倚而名之非以其不可名而姑寄之也若孟子之言性善則固謂夫未發之中本無不善耳是則中亦何自而岐乎若其所論孟子引詩之說則深得古人之用心矣曰侯尹如何曰侯氏語約未見其失尹氏謂愚惡非本然則

可謂賢而善者亦非本然則為湍水之說而流於佛
老之言矣曰然則荀揚韓子之說孰為近耶曰是皆
不知性之為理而以氣為性者荀揚之失蓋不難見
獨韓子以仁義禮智信為言則固已優於二子而
近世諸儒亦未有及之者但亦不察乎其所以不齊
者為氣使之然是以其論有所闕而不完耳

或問程子云既發則可謂之情不可謂之心者如何曰
是亦記者之誤耳程子論心惟荅呂與叔書最後一

篇為盡而張子所謂心統性情亦為切要若前所謂動為心者則與此正相反而胥失之矣曰他說如何曰程子理義悅心之說程子之意也至矣張子理義全在天以下文考之天當作人其禮文通俗之說則不可曉曰呂氏所謂虛而誠者何也曰此亦張子之意也亦曰形而上者無非實理耳然曰善之所由出又以性可以為善則亦離善於性而失之矣其論地有肥磽雨露之養人事之不齊者則密而同然之說

與謝氏悅心之說亦皆善也

或問夜氣之說曰程子張子皆至矣楊尹亦無失其旨者曰然則夜氣者特休息之餘氣清明者耳而程子遽以為良知良能者何哉曰良知良能非指夜氣而言也指夜氣之所存者而言也蓋此章之說本以仁義之良心為主以為雖或流於物慾而其暮夜既得休息則其氣復清明而有以存夫此心耳及其旦晝而接物也則又梏而亡之是以流於禽獸而不反耳

其存其亡蓋皆以心言之初不以為氣之存亡也故
其下文引孔子之言以明心之不可不操者則其意
益明矣但日夜所息以下只以好惡相近為良心之
萌蘖不復更著心字故說者反謂氣有存亡而欲致
養於氣則此章文意首尾衡決而日用之間所以用
其力者亦且散漫而無可守之要矣非程子以是明
之孰能知其旨之為然哉然其語意亦頗深約予初
讀之亦未覺其然也後因諷誦孟子本文忽悟其意

然後求於程子之說乃若有契於予心者耳雖由予之愚暗而然然亦可見讀書之不可不熟而前賢之說其微詞奧義又非一見之所能窺也曰程子以爲心無出入然則其有出入者其無乃非心之正耶曰出而逐物者固非本心之正然不可謂本心之外別有出入之心也但不能操而存之則其出而逐物於外與其偶存於內者皆恍忽無常莫知其定處耳然所謂入者亦非此心既出而復自外入也亦曰逐物

之心暫息則此心未嘗不在內耳學者於此苟能操而存之則此心不放而常為主於內矣易之陽絕於外而生於內者於卦為復象正如此而其象曰出入無疾朋來無咎則其意亦猶是也曰程子又以范氏不識孟子而能識心何也曰是其氣質之粹美而無逐物之心耳若聖賢所以通天下之志而盡人物之性者彼固未及知也

或問程子所謂聖人求道之切須求其所以如此者果

何謂耶曰聖人之所以如此亦設詞以教人耳然其所以欲人之如此則豈不曰道不可以須臾離而天理未易明人欲未易去幾微之間一有間斷則為失其本心也耶自此之外則亦無以汲汲為矣

或問十章之說曰張子呂尹皆得之矣張呂之說有相復者則不知果誰之說然呂氏為詳也程子外書所謂義無對者意亦通此然孟子所論宮室之美妻妾之奉窮乏得我此三者或物欲之尤人所易溺或意

氣之私人所不能免者自非燭理素明涵養素定而
臨事有省察之功未有不以此而易彼者也昔程子
之門人有為不義者或問之曰是人從學之久豈其
全無知識以至是耶程子曰謂之全無知識則不可
但義理不能勝私欲之心即至此耳愚謂此言以責
人言之則恕以教人言之則切尤足以發明孟子此
章之意

或問十一章之說曰此孟子發明學者用力最緊切處

而程伯子之言至矣其言曰下學上達則固不以就
於此而已也其論人心之辨析理尤精其以仁為就
事言者猶曰以其理而言爾范氏之言明白詳盡得
告君之體楊氏孔子未嘗言仁之說予於論語蓋已
辨之其曰仁人心也最為親切則得之然亦必以程
子之說通焉然後毫釐之間無所差謬不然則將直
以心字訓仁而不察其名義之所主者亦不能無失
矣

或問十二三十四章之說曰范氏詳矣雖以人君之事為言然學則無貴賤大小之間學者反之於身亦未嘗不可用也張子二說恐皆有未安者孟子所謂愛身亦曰不使陷於不善而其所以養之者則又當養其大者而不可唯口腹之養也其論口腹真尺寸之膚者亦非本文之意

或問十五章之說曰程子泛言非以釋此章之義也尹氏之云則失其序矣大抵孟子此章之要正在夫先

立乎其大者之一言耳蓋大者既立則凡動靜云為皆主於思而不隨於物其不中理者鮮矣范氏之箴蓋得其旨未可以晚出而易之也

或問人爵從之有以為從之者猶言其任之云爾如何曰是蓋嫌其猶有意於人爵之求耳殊不知此章之意所以為天理人欲之別者特在乎求與不求之間有意於求則是乃所謂修天爵以要人爵者君子固已斥之矣其或不求自至則是乃理勢之必然者而

又何嫌之有哉曰修天爵以要人爵者雖曰修之而實已棄之久矣何待得人爵之後始謂之棄耶曰若是者猶五霸之假仁猶愈於不假而不修耳聖人之心寬宏平正善善蚤而惡惡遲不如是之急迫也且若是言則彼直棄而不修者又將何以處之耶

或問十九章之說曰張子敦篤虛靜之云者於學者為有功然比之孔子之言則有間矣學者審之

四書或問卷三十六

欽定四庫全書

四書或問卷三十七

宋 朱子 撰

孟子

或問首章之說曰禮之大體固重於食色矣然其間事
之大小緩急不同則亦或有反輕於食色者惟理明
義精者為能權之而不失耳權之不失是乃所以全禮
之重而深明食色之輕也觀於寸木鈞金之喻孟子

之意亦可見矣而范尹於此皆若有所回隱遷就而
不欲言者豈所謂未可與權者歟

或問二章之說曰程張至矣張子姑舉其易者言之而
推之以至於事無巨細莫不皆然發明言外之旨尤
為有功楊氏之說亦為親切但其書又有曰佛者龐
蘊有神通并妙用運水及搬柴之說此自得者之言
最為達理但其言周遮使便通徹亦須把來做一件
事若孟子之言則無適不然矣愚竊感之夫釋氏之

言偶與聖賢相似者多矣但其本不同則雖相似而實相反也蓋如此章孟子之言均是行也而一疾一徐其間便有堯桀之異是乃物則民彝自然之實理而豈人之所能為哉若釋氏之言則但能識此運水搬柴之物則雖倒行逆施亦無所適而不可矣何必徐行而後可以為堯哉蓋其學以空為真以理為障而以縱橫作用為奇特故以吾儒之論正相南北至於如此今不察焉而以達理自得稱之至語其病則

以為特在於周遮著意而已如此則是凡為佛者去
此二病而遂與吾學不殊也且其所謂無適不然者
亦未見其有以發明孟子之意而異於釋氏之言者
豈其記者之失與不然則殆於儒佛語性之不同亦
有所未辨矣程子有言以吾觀於釋氏句句同事事
合然以其本之不正是以卒無一句一事之同正謂
此爾或問於胡文定公曰禪者以拈槌豎拂為妙用
如何公曰以此為用用而不妙須是動容周旋中禮方

始是妙用處以此求之楊氏之言其得失可見矣尹氏推說堯舜孝弟之意亦佳而集義未之載也曰學莫難於知道故欲脩身者必以致知為先今日道豈難知而特患於不為何哉曰道之精微固難知也然自始學言之則如是而為孝如是而為弟如是而為不孝如是而為不弟其大體向背之間豈不明而易知乎致知云者亦曰即其已行之知而推致之耳今曹交於此似有所未知借曰知之亦未必能行之也

亦何暇及乎致知之方乎予於大學之序必以為因小學之成功而後力有所施蓋為此耳

或問程子論小弁之怨與舜不同何也曰舜之怨曰父母之不我愛於我何哉蓋反諸身以求其所未至之辭小弁之怨曰何辜於天我罪伊何則自以為無罪矣此其所以不同也歟

或問四章楊氏之說曰是則然矣然其意本非以為君子欲求勝人而後不言利也疑記者小失之讀者不

可不察

或問儲子儀不及物幣可反乎曰始交未容逆料其不誠既受則不可反矣

或問三子之說曰程子張子至矣但張子成性之說有所未安而其曰徒克己而無禮亦何所賴又須反禮然後至者則亦有說焉夫孔子告顏淵以克己復禮而又語其目曰非禮勿視聽言動則是己之與禮更為消長固未有不以禮為則而能克己者亦未有既

克己而不復禮者也而張子云爾者豈以有若浮圖之盡屏物欲而卒不合禮者耶然若是者非既克己而不復禮也乃其克己初不以禮為則而徒自苦耳其論天民乃若王氏所謂非一國所得容一君所能有者尤不可曉其論孔子五薦五就則得之矣曰楊氏如何曰其論不可易地者未必然其曰聖人無取天下之心則至論矣

或問亮之為義諸說不同如何曰考之說文古無亮字

今以為與諒通者得之矣然諒有二訓有止訓信者
友諒之類是也有為必信者貞而不諒是也至於執
字則但為持守之意而未有以為固滯者如中庸所
謂固執者是也今程子以亮為固執固為必信之意
而讀惡曰烏則其說宜曰不必信則不固滯矣張子
亦以諒為必信而讀惡從去聲則其說宜曰所以不
必信者惡其至於固滯也是雖其文勢小有不同然
以諒執為病則同也夫諒有二義從其一焉可也至

於執則無可病之理故吾以是推之而從尹氏之說
直以諒為友諒之諒言君子舍是則無可據守也

或問尹氏去就之說曰三者之去就亦視其所遭之時
如何耳孔子皆嘗為之又可以上下等之耶意者其
有所未達於免死之說故歟

四書或問卷三十七

欽定四庫全書

四書或問卷三十八

宋 朱子 撰

孟子

或問心無限量者也此其言盡心何也曰心之體無所
不統而其用無所不周者也今窮理而貫通以至於
可以無所不知則固盡其無所不統之體無所不周
之用矣是以平居靜處虛明洞達固無毫髮疑慮存

於胃中至於事至物來則雖舉天下之物或素所未
嘗接於耳目思慮之間者亦無不判然迎刃而解此
其所以為盡心而所謂心者則固未嘗有限量也大
槩此章所謂盡心者物格知至之事曾子所以一唯
而無疑於夫子之言者是也所謂事天者誠意正心
修身之事曾子所以臨深履薄而無日不省其身者
是也所謂立命者如是以沒身焉曾子所以啓手足
而知免得正斃而無求者是也以是推之則一章之

旨略可見矣曰諸說如何曰程子至矣然其言有難
知者當深思之亦有記錄傳寫之誤者當明辨之如
曰贊則真養之而已者其誤也與其曰無限量與三
者之名義則至矣其曰才數者使不盡者論心之發
其大目固不外乎四端然其間支分脉布千差萬別
則有不容以四目盡者是以不容遍舉而悉數也其
以運用為意而非心者嫌於不盡其體也呂與叔最
後一書觀之可見矣其議張子京師長安之說亦至

論但其所譬恐未的若曰猶居開封而識京師則庶
矣蓋性只是心之理天即理之自然處初非有二物
也其論釋氏有盡心知性而無存養之功者正承上
文譏其無下學非上達不連屬而有間斷之病耳非
真以是許之也更以後段荅劉質夫之語觀之意尤
明白其論直內方外而曰既無方外則所謂直內者
其本亦不是意亦如此學者深考之可也張子之說
尤詳其曰大其心者固善蓋欲人明理以盡心而不

梏於聞見之狹如其下段物出於性一條所云者然
有大之之意而初無用力之方又以聖人盡性為言
則非孟子之本意其曰有外之心不足以合天心者
程子嘗引以明自慊之意甚善而張子之自言則又
若有不同者其曰知心之所從來亦未免為有病其
曰盡人道則可以事天又曰性原也心派也此類又
皆程子所議京師之說也其曰性大於心尤深可疑
若曰修身養性始能盡性則善然其後復有盡心即

記所謂盡己之性者則又抵牾矣其曰舍此見聞別自立見始謂之心此亦可疑大抵其說不免有強探力取之意不若從事於程子所謂積累貫通之說則不期於大而大不待離舍見聞而心之體用未嘗不在我也其論天壽不貳之說則善其以魚子喻天命之性則又前原譬京師長安之說也且魚子既受大魚之氣則大魚之氣今固已在是矣不必成魚然後為反原也今以人性本天而皆足以成天之性則方

其未成也天人固不合矣此程子所以每致疑於其說也東見錄中有語張子穿渠引源一條正破前原譬之說而曰後來此議必改則其惜之深矣今以此語說者考之書未見其有改也豈記錄之有所遺乎范氏篇首大意最善至引中庸以後則雜亂多失不可勝論惟曰窮理所以盡心者近之至謂盡心所以窮理則又倒置矣呂氏即張子之說而後段精密有可觀者謝氏充擴得去者得之然其猶在貫通之後

乎其以心專為發用則吾於綱領之篇已辨之矣游氏於此章首尾次序大意甚有條理而其所以為說則皆老佛之餘也如曰心之地無餘蘊而性之本體見者如曰守靜後本內視反聽致一致專者豈儒者之言而孟子之旨乎其曰至大至剛以直則孟子所論乃氣之本體而以為養性之道其說尤不可也楊氏心不可無性不假修之說善矣至論心之為物與其所以盡之者則不能使人無疑尹氏存養所以得

天理者大意可觀而於孟子之本文又無所與也曰
然則存心養性儒者之說可得聞乎曰存心者氣不
逐物而常守其至正也養性者事必循理而不害其
本然也以此推之則儒者異端之辨明矣曰然則心
之為物與其盡之之方奈何曰由窮理致知積累其
功以至於盡心則心之體用在我不必先事揣量著
意想象而別求所以盡之也

或問二章之說曰程子至矣其曰桎梏死者莫非命然

聖人却不說是命此最是得其文義者若張子曰命之於人無不正則非文義而又曰順乃受其正則非文辭矣巖墻一段則善而其他大旨教人毋為不直之求徒以自陷於不正者警戒尤切學者所當深念也范氏說亦得之所引李泌之言於告君之道尤為有力尹氏之說出於程子下章詳矣

或問三章之說程子以求在我者為義求在外者為命以求在我為求義乎則下言求在外者非求命也謂

以義而求乎則求在外者不可言以命而求也又有
聖人有義而無命與下數節之說則義命之云似專
為求在外者設此乃分析内外言之何也曰在我者
如仁義禮智之屬皆此理所當為以其求之得之莫
不有義故曰義在外者如富貴利達之類皆命有所
制以其求之雖有道而得之則有命故曰命然聖人
則力為我之所當為而不問彼之所制故曰有義而
無命此以所求之内外而言也若專為在外者言則

後段所謂求之有道者義也得之有命者命也是其
言各有當意各有指然錯綜而言則理亦無所不通
也曰程子既曰中人以上不消言命又曰中人以下
以義處命矣而又曰聖人而言命蓋為中人以上者
設何也曰以文考之前說兩見皆同而後說無他援
据當以前說為正後說蓋誤以下為上耳且其後又
云聞命而不能安又其每下者則前此固已富有下
字矣後段之誤蓋無疑也曰最後一說又以在我未

盡雖不可以言命然富貴貧賤壽夭是亦前定然則
人之所取亦前定耶曰若是者其貧賤而夭固或有
非人所取而得之於天者然無以驗其必然則君子
固不謂命若其富貴則君子處之固有得天下而不
為者矣亦安得遽謂之命而安之乎此程子言義不
言命之說所以有功於學者其亦前聖所未發之一
端也張子說亦皆善而後說尤詳其言義命似專為
求在外者言之其曰有內有外者是又以求在外者

為自有內外錯綜而觀亦無不通楊氏所論之人則
程子所謂每下者耳尹氏以命為外者亦曰制之在
彼云爾

或問四章之說曰萬物皆備之說程子至矣蓋萬物之
生同乎一本其所以生此一物者即其所以生萬物
之理也故一物之中莫不有萬物之理焉所謂萬物
皆備云者亦曰有其理而已矣反身而誠則張子無
不慊於心作德日休實到實有之說為實若不責之

處心行事之實而但欲反心以求衆理而想象安排
使其備於此焉則將何所據以為實而其為心亦已
勞矣尚何樂之可言哉若程子學者先須識仁一條
則其說高矣非所謂盡心知性不假存養者不能及
也其諸程子自道其所以入德之由乎雖非學者之
所及然玩而繹之其所以發人者亦深矣強恕而行
則亦程子之說得之但以立人達人為仁之方則吾
於論語既言之矣張子既誠而又強恕之說失之其

曰誠者自謂之誠亦有誠於惡者則其失又愈遠矣
楊氏之說正是想象安排之病尹氏雖約然極有味
曰強恕初不言忠無忠何以為恕耶曰有心為恕則
忠固在其中矣所謂無忠做恕不出兩字不容去一
者正謂此也

或問六章七章之說曰舊說皆善矣然六章李氏以為
人而無恥則其為恥無復可恥矣七章亦猶謂人若
不恥其不及人則終不能及人者於義亦通學者擇

焉可也

或問九章之說曰范尹之說皆善而范氏所謂孟子言道德必以義配者尤有功

或問十章之說曰范氏推言聖人一節甚得言外之意或問十二章之說曰去惡除害固尹氏所引程子之說也而程子又自有救焚拯溺之說二者不同子之去彼取此何也曰救焚拯溺非常有之事所指者狹不當以此為說若曰去惡除害則正所謂辟以止辟者

彼為惡以害人其罪當死吾求所以生之者不得而後殺之以安衆而厲其餘凡此皆以生道殺之也彼亦何怨之有且或去惡如伐叛除害如救水火往者不幸而死亦無所怨此又足以兼彼之說而彼不足以及兼此也

或問過化存神之說程子所說固與張子謝氏不同而其後說以無我言過化以在己言存神則似又若張謝之說何也曰張謝之說皆疑於老佛之意以此章

上文考之恐其指不為是也故程子直以所過者化為
及物而於易傳又有所過變化如虎豹炳蔚之言其
旨明矣蓋言所過者化則凡所經歷物無不化不必
久於此而深治之然後物從其化也然其曰經歷亦
不必為經行之地凡其身之所臨政之所及風聲氣
習之所被皆所經歷也至於無我之說則出於楊氏
之篇或者固疑其不皆出於先生之口也所存者神
前說既以立之斯立等語明之則其意亦明矣其曰

在己者蓋以化者無意而及物此則誠於此而動於彼如所謂從欲以治也但其感應之速如影響形聲之召有不知其所以然者是則所謂神耳以是推之則程子於此初未嘗有異說也但張子謝氏文意亦少異張子過存字稍輕而化神字實謝氏則過者存者字實而化神字稍輕暢錄所云蓋同謝氏之說以文勢論之為優於張子者然其決非孟子之意則均但近年學者深愛此說固不可不詳其失耳

或問仁聲之說曰程子得之矣舊說以為先王之樂張子從之恐不然也

或問十五章之說曰程子至矣張子天下為度之云恐非孟子此章之正意楊氏說固善然有未盡處蓋既曰惻隱之心仁之端也又曰親親仁也則惻隱親親固仁之發而仁則惻隱親親之未發者也未發者其體也已發者其用也以未發言則仁義禮智渾然在中者非想象之可得又不見其用之所施也指其發

處而言則日用之間莫非要切而其未發之理固未嘗不行乎其間要之體用未嘗相離故孟子因用以明體正欲學者即是而默識之耳尹氏大意得之其曰能不識者則又言外之意也

或問十六章之說曰張子得之矣范氏既曰聰明聖智矣又曰積而成聖無乃自為矛盾耶又謂及其為聖人則是舜之初果為野人而後乃為聖人也楊氏非正解此章意者尹氏無我之說亦未然也

或問十七十八章之說曰范氏之言如此亦可謂惻怛而懇至矣誨爾諄諄聽我藐藐嗚呼難哉

或問十九章之說曰程子至矣然於天民之名亦少有未盡處其曰天民大人亦係乎時與不時者蓋天民專指潛隱未得位者大人則其德已著如乾之二五通上下而言之也張子天乎民者尤為未安而論達可行於天下而後行之則善必先正物之說似亦可疑豈設辭之未決耶呂氏論天民之異者得之其第

二說與楊尹說亦皆善也曰然則此其不言聖人何也曰大人蓋亦通言之矣如乾之大人豈必以為充實光輝而未化者耶

或問二十一章之說曰程子至矣宜深玩之楊氏以仁義禮智根於心為本來如此者亦曰其所稟者然耳蓋孟子所謂所性猶性之之云也

或問二十三章之說曰范氏極陳堯舜三代養民之法而歸之欲治天下先治其心者可謂至當之言矣

或問二十四章之說曰程子張子至矣其曰無窮又曰
有本當合之曰言道之有本而無窮則善其論成章
亦然張子大意得失亦與程子相似呂氏難為言以
上得之楊氏所論勝物而小之者王雱之說也其斥
之當矣然此章雜取衆理錯比成文以明難明之理
猶詩之有比興也

登山觀海流水盈科
興也觀濶容光比也

學者反復而

詳玩之則可以默識於意言之表矣

或問二十五章之說曰諸說皆善而程子未接物時之

論尤能發明言外之意學者所當深念也然程子又嘗言不獨財利之利凡有利心便不可如作一事須尋自家穩便處皆利心也如此則善利之間相去毫髮苟辨之不明其不反以利為善者鮮矣此大學之道所以難以誠意正心為重而必以格物致知為先也

或問二十六章之說曰程子張子至矣而張子之言尤精且詳其論無忌憚者所以憂後學者至矣可深玩

也謝楊之說亦善呂氏論文義處得之但所論正權
以下多所未安如曰其體純而不雜而以盡物之性
為權則未見道之所以為體者而物性又在道體之
間其論堯舜無能名以為不在彼不在此不在中則
恐亦非本文之正意而近於釋氏不屬中間與內外
之說至謂雖為我而與天下同其利雖兼愛而立愛
自親始則其文義尤不可曉夫既專於為我則安能
與天下同利能與天下同利則不得為為我矣既兼

愛則安能立愛自親始能立愛自親始則亦不得為兼愛矣兩者相攻如水火之不相入乃欲兩取而兼存之推尊孟子而并容楊墨得無亦有不叛聖賢而兼取老佛之微意耶

或問抑下惠不辭小官楊氏既以為和又以為介何也曰不辭小官和而介也人知其為和而不知其為介焉楊氏之說為有功矣曰尹氏之訓如何曰詩家固有此訓然施之於此則有不通也

或問三十章之說曰諸說皆善但楊氏以卒能一正天下為久假不歸孔子以仁許之為惡知非有則誤而胡氏以為五霸假之未久而遽歸者亦非是蓋如此說則其所以啓司馬公之疑而來蘇氏之辨者蓋無足怪而予已論於辨惑之篇矣集註二說雖若未有定論然皆庶幾其不悖於孟子之本意云

或問三十一章之說曰程子之說曲折詳盡其處義精矣楊氏以伊尹惟知有忠者亦為得之然孟子但論

在我者有是心則伊尹之事可為一有毫髮之偽雜乎其間則不免為篡賊耳不以素行之著不著天下之疑不疑為可否也其曰中道者則善

或問三十三章之說曰范氏詳而盡矣但孟子之言乃理之當然非有為而言之也所謂急於救民者非是或問三十五章之說曰范氏所論得其大意而楊氏之說則又詳矣然桃應之問孟子之荅皆非以為真有是事也蓋特相與極論聖賢之心以為臯陶知有法

而不知有天子之父舜知有父而不知有天下各盡其道而不相悖焉耳而楊氏以為舜之於此猶待於權其輕重而計其不可以忘父也則非所以論聖人之心矣又謂與之執以正法則何以異於楚人之直躬者又謂既執而後竊負以逃焉則臯陶之獄何以異於灞上棘門之軍哉是皆以辭害意之過是以徒為紛紛而反病於理也夫孟子之為此言或者既不之信矣而信之者其為說又如此則聖賢之心終亦

何自而明哉予於辨惑論之已詳讀者考焉可也曰
然則楊氏八議之說如何曰是則然矣而其說施於
周世家而不及於舜何哉鄉使臯陶必執而不釋舜
必去而不留則朝廷公卿海內臣庶之心吾知其亦
必出於此矣蓋法非天降地出亦生於人情而已矣
但臯陶必不為此以私於舜舜亦不以此祈於臯陶
此又不可不知耳楊氏後說以為孟子只是論舜心
者為愈於前然為舜慮而不及乎臯陶則其說亦有

所未周也尹氏之說雖約然極有味學者宜深玩之
大抵當知必有渾然天理而超然不累於物之心者
焉則天下無難處之事矣

或問踐形之說曰人之生於天地之間也莫不有形其
有是形也莫不有色而本其所得於天者則是形是
色莫不有所以然之故焉莫不有所當然之則焉是
則所謂天性者也然衆人梏於氣稟之偏狃於習俗
之蔽而不能無人欲之私是以視則不明聽則不聰

貌則不恭言則不從蓋不能盡其形色本然之理則雖有是形而無以踐其形也惟聖人能盡其性而無一毫人欲之私雜於其間是以視則極明聽則極聰貌則極恭言則極從蓋凡形色本然之理無一不盡既有是形而又可以踐其形焉踐云者本有是物而又能修其實以副之如踐言之踐也程子張子游楊尹氏蓋皆此意但張子第一說為可疑耳曰楊氏別說有之曰形色天性與釋氏色空之論一也吾聖人

以為天下固然之理而以常事言之故言近而聞者
無怛焉異端之學自以為精微之論故累千萬言而
不能竟其義而學者莫知適從此儒釋之辨也子以
其言為如何哉曰予於前篇徐行後長之論既言之
矣然天命之性無一理之不具天下之物未有實於
此者而以釋氏之所謂空者同之不亦異乎且若其
言則是儒釋之妙同出於空彼之所以為異端者特
以其自謂精微而多言以失之耳若是者予竊深有

疑於其言故不敢以列於集義之書學者誠以程子所謂句句同事事合而卒不同者質之則亦可見其失矣

或問四十一章之說曰范氏失之尹氏所引論語之文亦不類也

或問四十二章之說曰張子初說於文義盡之矣其後一說則所以明雖天下之有道而不求身之必顯也范氏引守死善道得殉字之意矣其論人君用人之

法亦甚善至謂以道殉人者雖得之無所用則尤切
中於事理矣

或問四十五章之說曰程子張子至矣張氏推明程子
所以論西銘之意甚善其荅程子書時未及此也豈
其晚年所見始益精詣也與尹氏一本無偽之說亦
善

四書或問卷三十八

欽定四庫全書

四書或問卷三十九

宋 朱子 撰

孟子

或問武成血流漂杵之云乃紂之前徒倒戈之所為荀子以為殺者皆殷人非周人者是也而孟子之不信何哉曰此亦拔本塞源之論蓋雖殺者非我而亦不忍言也程子以為孟子設為是言蓋得其微意矣張

子教人讀詩書之說亦甚善

或問好名之人能讓國矣而不能忘情於小物何哉曰
千乘之國辭受之間十目所視十手所指之地也簞
食豆羹得失之際則微矣人亦何暇注其耳目於斯
哉此好名之士所以飾情於彼以取美名而不意其
鄙吝之真情實態乃發露於所忽易而不虞之地也
趙氏舊說不察乎此使孟子之言為無所發明警戒
而若有所不必言者范氏因之誤矣尹氏之言若有

今說之意然失之太簡無以見其必然也

或問民貴君輕之說得不啓後世篡奪之端乎曰以理言之則民貴以分言之則君貴此固兼行而不悖也各於其時視其輕重之所在而已爾若不惟其是而姑借聖賢之說則亦何辭之不可借而所以啓後人之禍者又豈止於斯言乎曰變置社稷程子以為變其所配之人諒乎曰以湯變夏觀之則固有是事然初不為水旱也且以水旱之故不自省己而遽廢其

配祭之人於理亦有未安者若集註之說則出於彭城陳無己之論曰有為句容令多盜改置社稷而加禮焉既而盜止愚竊以為此或有合於古人之意故取之以為說焉庶乎其少安也

或問程子以為夷惠聖人傳者之誤今考之孟子之言此者非一豈皆誤乎曰未必誤也彼曰聖之清聖之和則固不思不勉而從容自中矣但其所至出於一偏而不若孔子之備所以不得班於孔子耳曰孟子

學孔子者也乃屢稱夷惠而深歎仰之何耶曰夷惠之行高矣然偏勝而易能有迹而易見且世人之貪懦鄙薄者衆一聞其風而興起焉則其為效也速而所及者廣譬如薑桂大黃之劑雖非中和然其於去病之功為捷而田夫販婦大寒大熱者之所便也若孔子之道則廣大而中正渾然而無跡非深於道者不能庶幾其萬一如參苓芝朮之為藥平居有養性之益而緩急伐病之功未必優於薑桂大黃非所以

施於閭巷之間危急之候也孟子屢稱夷惠而不及於孔子其意殆以此耶

或問十六章之說所謂合而言之者其以人為仁之謂乎曰楊氏之說如此矣非孟子之意也孟子此章但論仁與道之所以名耳故本文以言之為說程子亦以率性謂道道是總名釋之也蓋言人而不及仁則血氣物欲之私而已言仁而不即人之身以明之則又徒為虛言而無以見天理流行之實故必以仁之理

合於人之身而言然後仁之為道可見蓋仁則性而
已矣道則父子之親君臣之分見於人之身而尤著
程子所謂公而以人體之亦此意也張子意亦如此
而復小異覽者詳之其曰義生於仁之不得已則其
名理當矣游氏以人仁泯而後為道謝氏以道立而
人仁之名亡其皆老氏之餘乎或曰外國別本人也
下有義也者宜也禮也者理也智也者知也凡十五
字信乎曰不可知也姑記之以俟知者可也

或問張子接浙之說曰如此則未見其去之甚速之意
當從舊說

或問發棠之說曰范氏言之詳矣然其所以止為不可
復之故者雖未可以臆說定顧其事勢則或然耳

或問二十四章之說所謂性命者何不同也曰性者人
之所受乎天者其體則不過仁義禮智之理而已其
發則雖食色意欲之私亦無不本於是焉命則因夫
氣之厚薄而賦於人之名也不惟智愚賢否之所繫

雖貧富貴賤之所值亦無不由於是也故君子於食
色意欲之私則不謂之性而安於貧富貴賤之有命
於智愚賢否之殊則不謂之命而勉於仁義禮智之
有性也曰然則此其專為貧賤愚不肖者言之耶抑
其通言之也曰孟子之意似若專為貧賤愚不肖而
言者而其推之則亦無不通矣蓋富且貴者雖所求
之必得而亦必有制度之節聖且賢者雖所稟之已
厚而亦未嘗不勉其所當勉也曰諸說如何曰程子

至矣張子又自為一說於義亦通惟智之於賢者一句恐未必然其曰付命於天責成於己者則語到而意切矣又不以薄而不修不以淺而不勉者亦善最後一段性也命也以下尤佳范氏以五者之命皆為天之所以與我者然君子不以天既與我而不修此則專主於聖賢而言若前所推說者然以為推說則可以為正說則有性焉一句為不通耳楊氏以性中本有聲色臭味之五者終亦未盡蓋推其所自而本

於性則可以為本有而直謂之性則不可此亦當深
察也或問以五者之命皆為所值之不同如舜之於
瞽瞍則仁或不得於父子文王之於紂則義或不得
於君臣孔子之於陽貨則禮或不得於賓主子貢不
能聞一知十則智或不得於賢者孔子不得堯舜之
位則聖人或不得於天道此皆命也然君子當勉其
在己者而不歸之命此說與張合但賢者一句不同
於義亦可通也

或問二十五章之說曰善者人之所欲惡者人之所惡其為人者處心造事行已接物凡其所為一皆可欲而不可惡則是可謂善人矣然此或其天質之美或其知及而勉慕焉未必其真以為然而果能不失也必其用力之久一旦脫然有以真知其善之在已而不得不然決定真實而無一毫虛偽之意然後可以謂之信人矣然亦足以自信於心而已未必其行之充足飽滿而無歉於身也然既信之則其行必力其

守必固如是而不自己焉則其所有之善充足飽滿
於其身雖其隱微曲折之間亦皆清和淳懿而無不
善之雜則是所謂美人者也然亦足以充於其內而
已而未必其能發見於外也又如是不已焉則其
善之充於內者彌滿布濩洋溢四出而不可禦其在
躬也則晬面盎背而施於四體其在事也則德盛仁
熟而天下文明是則所謂大人者也然大而化則
其所謂大者未能離乎方體形迹之間必其德之盛

者日以益盛仁之熟者日以益熟則向之所謂大者
且將春融凍解泯然無迹而與天地合德日月合明
四時合序鬼神合其吉凶矣是則所謂聖人者也至
於是則造道入德之功至矣盡矣不可以有加矣是
其盛德至善之極無聲無臭之妙必有非耳目所能
制心思所能測者是則所謂神者而非聖人之上復
有神人也夫自可欲而至於大則思勉之所及也至
於聖且神焉則雖非思勉之所及然非思勉之而不

已焉則亦未有至焉者也曰子說如此然程子張子之言可欲則皆以其理言之若與子異何也曰固也自理而言則凡可欲而不可惡者皆善之理也自人而言則亦必其知是理而志之之後得如是之人也二先生之以理言欲學者知是理而志之以求為如是之人耳有志於學者不可以不熟考而深思之也但如其言則於文義微有不協使可欲一句若無實者故張子又有善信二句離則不可之說蓋推其文

義終有所未安也故愚竊獨以人言之庶幾不失其
文義而其理則固未嘗有違也抑張子之言又有所
謂大能成性之謂聖者有以大而化之為天道神化
之化者有所謂心存無盡性之理則皆不能無可疑
者其曰求仁必於未惻隱之前明善必於未可欲之
際則欲學者用力於平日涵養之功非欲使人求之
恍惚窈冥之際也曰樂正子以善名矣而以鋪歆從
子教先館舍後長者何也曰言在二者之中則有餘

於善而不足於信矣此其所以未免於程子所謂受變於俗者歟

或問逃墨逃楊果若是其有序與抑其偶然言之無先後也曰張子之言則固以為有彼善於此之意然亦未可知也

或問三十章之說曰此無異說但夫子設科以下舊說以為孟子之言而讀子為予則失之矣又有以為此章皆或者與館人問荅之詞恐亦或有此理更考之

可也

或問三十一章之說曰張子呂氏皆得之但呂氏說爾汝之實與仁略義詳者恐未然爾汝集註已言之仁義之詳略則不忍之心與害人之心易見而羞惡之心穿窬之類多端故彼略而此詳欲其於此有以識其推擴之端耳非為欲其不為所取者設也呂氏蓋推其說以告君欲其有以審納之耳故其言如此然不先明聖賢之意推說為主亦非義理之所安也

或問三十二章之說曰不知道者務為高遠之言則固荒唐而無餘味然欲其近則又鄙淺而無深遠之趣也不知約之可守則固汎濫而少成事然欲其約則又狹隘而無廣博之功也然則所謂善言善道者非有道之君子其孰能知之乎曰諸說如何曰皆得之但張子下帶之說非是

或問三十三章之說曰程子至矣其論堯舜禹湯文武一條尤有功非其學臻聖域則孰能及此乎但以經

德不回為教人之語則小失其文義耳然其所謂動容周旋中禮盛德之至者兼夫經德不回以下而言聖人之事也行法俟命朝聞夕死者以言進學之方也此其等級明矣而楊氏乃以為至盛德之地然後能行法而任夫生死又以哭死而哀皆為行法之事則正猶尹氏之論純亦不已三月不違之誤也予亦已辨之於論語之篇矣呂侍講說詳實而於章內數語聖賢之分者有所未明又以反之為反身而誠則

此為復其初彼為反諸已其所指亦不同矣呂正字說皆精密但前說乃以行法俟命通乎上文而言則亦誤也謝氏所謂當然而為之及楊氏所謂如惡惡臭如好好色出於誠心之自然非為人也其說亦善然謝以為當然而為之是為天之道所謂以此贊夫聖賢則可以此自處則甚乎其廣已而造大矣尹氏不論性之之德而專言反之之功其意亦善而語有未到讀者審擇而精思焉可也然是理也三代以降

惟董子嘗言之而諸葛武侯言於其君有曰臣鞠躬盡瘁死而後已至於成敗利鈍非臣之明所能逆睹也程子語其門人有曰今容貌必端言語必正非欲獨善其身以求知於人但天理當然亦曰循之而已矣此三言者所指雖殊要皆行法俟命之意外此則亦寂寥而無聞矣斯道之傳不傳考之於此其亦可見也夫

或問孔子畏大人而孟子藐之何也曰程子以為記錄

之誤或然而未可必也呂侍講敷陳詳實反復懇至
尤得告君之體其曰藐之所以敬之則所以發孟子
言外之意者盡矣謝揚以孔孟之分而言則學者所
當知也然予嘗以為後世之畏大人非畏大人也畏
其巍巍然而已矣故進而君公之退而爾汝之孟子
之藐大人也不視其巍巍然者而已矣故雖不肯枉
尺而直尋而齊人之敬王莫如孟子也特以當世
之士以道殉人內無所守故特發此以立其志使其

意氣舒展無所拘束勿畏其巍巍然爾若夫君子以禮存心固將無所不用其敬豈特於大人而反藐之哉

或問養心寡慾之說曰程子至矣而其曰不必沉溺者尤密其論荀卿之失者尤精也呂侍講所謂天下之難持者莫如心天下之易染者莫如欲其亦善矣但所謂心者性之用可以成性可以失性則懼其不純儒者之說也曰周子之言不止於寡而存者奈何曰

語其所至則固然矣然未有不由寡慾而能至於無者也語其所至而不由其序則無自而進語由其序而不要其至則或恐其安於小成也是以周子之說於此為有相發之功焉

或問狂狷鄉原之說曰程子二說皆善張子於反經尤致意焉皆切要之語也其曰正經能久則儘透徹學者當深念之呂范亦詳而文義間有未安者呂正字說反經以事言之固必至此然後為盡但孟子之意

未必遽指此也

或問卒章之說曰范氏所謂七篇大意者得之矣但禹
臯陶之徒本皆名世之士伊尹太公又湯文之師非
必見其君而後知之也至於湯文孔子又或生知之
聖亦非必聞前聖之道而後得之也此而曰見而知
之聞而知之者蓋以同時言之則斯道之統臣當以
君為主以異世言之則斯道之傳後聖當以前聖為
師學者不以辭害意焉可也至於章末二句則孟子

之致意深矣觀其所謂然而無有乎爾則雖若託於
不居而其自任之實可見觀其所謂則亦無有乎爾
則雖若歎其將絕而所以啓夫萬世無窮之傳者又
未嘗不在於斯也學者誠能深考其言而自得之則
古人雖遠而其志意之所存者蓋無以異乎日相與
言而授受於一堂之上也故於此竊以子程子之傳
繫焉後之君子其必將有慨然有感於斯者夫

四書或問卷三十九